

四庫全書

子部

欽定四庫全書

子部

黃氏日抄卷十一

詳校官中書臣康綸鈞

刑部郎中臣許兆椿覆勘

總校官進士臣楊懋珩

校對官助教臣胡子襄

謄錄監生臣任兆炯

欽定四庫全書

黃氏日抄卷十一

宋 黃震 撰

讀春秋

五

成公

名黑肱宣公子母穆姜諡法安民立政曰成

元年春王正月公即位

行即位禮也

二月辛酉葬我君宣公

五月而葬

無冰

岷隱於桓公十四年春無冰講義云詩三之日納冰  
今正月也四之日獻羔祭韭而出冰今二月也左氏  
所謂西陸朝覲而出之者今三月也大要十二月取  
冰且取且藏至正月而畢二月出冰至三月而用春  
秋書春無冰者去年十二月時燠無冰今年之春無  
冰可出春秋於是時而書之也

三月作丘甲

周制九夫為井四井為邑四邑為丘四丘為甸一甸  
六十四井五百七十六夫共出車一乘甲士三人今  
作丘甲是一丘出一甲一甸出四甲矣變法增賦故  
書

夏臧孫許及晉侯盟于赤棘

臧孫許魯大夫臧文仲之子號宣叔赤棘晉地去歲  
公孫歸父如晉謀去三桓未返而公薨臧孫許為三

桓去歸父之族而歸父奔齊今三桓懼其見討故作  
邱甲以謀伐齊盟赤棘以止晉兵皆三桓為已計而  
主之者行父也

秋王師敗績于茅戎

傳載晉侯平戎于王劉康公邀戎而伐之遂敗于徐  
吾氏書曰王師敗績于茅戎若曰王師自敗云爾茅  
公穀並作貿

冬十月

備四時之首

二年春齊侯伐我北鄙

岷隱曰宣公在位十八年與齊為好至親且密成公  
即位首與齊為仇斷道赤棘之盟將謀伐齊齊安得  
不伐我愚按斷道之盟晉本徵會于齊而適有齟齬  
耳赤棘之盟則歸父謀去三桓不遂而奔齊三桓怨  
歸父故謀伐齊齊侯輕躁故先伐魯觀鞏之敗可知  
齊侯之為人矣

夏四月丙戌衛孫良夫帥師及齊師戰于新築衛師敗績

傳載衛使孫良夫石稷侵齊與齊師遇石稷欲還良夫不可故敗按新築衛地恐齊亦來伐衛而與之遇於新築也

六月癸酉季孫行父臧孫許叔孫僑如公孫嬰齊帥師會晉卻克衛孫良夫曹公子首及齊侯戰于鞏齊師敗績季孫叔孫怨歸父欲去已不遂而奔齊力謀伐齊晉



郤克怨齊婦人笑其跛久欲伐齊衛孫良夫新敗於齊遂會師以伐齊若曹公子則役於大國者也故行父得以四國七大夫之師伐齊齊頃驕蹇自恣臨戰有滅此朝食之語故及於敗曹公子首公穀作手

秋七月齊侯使國佐如師己酉及國佐盟于袤婁

晉欲質齊侯之母及使齊盡東其畝國佐請背城借一乃得盟自袤至袤婁近奔五百里袤婁穀梁作爰婁

八月壬午宋公鮑卒庚寅衛侯速卒

宋文公立二十二年卒傳載其始厚葬衛穆公立十一年卒

取汶陽田

此本魯地也今晉使齊人歸之

冬楚師鄭師侵衛

楚以魯衛受盟於晉而伐齊故救齊而先與鄭侵衛  
木訥曰時楚共新立未能和諸侯晉不於此時反陳

鄭於既夷和齊魯以抗楚乃修一朝之忿助魯衛以  
敗齊則楚鄭之侵衛實晉致之也晉失此機而楚得  
盟諸侯於蜀矣

十有一月公會楚公子嬰齊于蜀丙申公及楚人秦人  
宋人陳人衛人鄭人齊人曹人邾人薛人鄆人盟于蜀  
楚侵衛則兵將及魯故公懼而潛服于楚以逆弭楚  
兵左氏謂之匱盟言畏晉而竊與楚盟也然昔之盟  
于晉者今皆盟于楚矣可不悲夫蘇氏曰蜀之盟諸

侯從楚者十一國晉不敢爭其後四十三年晉趙武  
楚屈建合諸侯于宋然後晉楚之從得交相見又八  
年楚靈王求諸侯于晉晉人許之然後諸侯始從楚  
皆蜀之盟啓之也蜀魯地是會也魯倡之楚主之

三年春王正月公會晉侯宋公衛侯曹伯伐鄭

宣十二年鄭從楚伐晉敗晉于邲故今晉伐之傳載  
復為鄭所敗獻捷于楚木訥曰諸侯冬從楚而春從  
晉冬盟鄭而春伐鄭何諸侯之不自安不自信也霸

主之不作也鄭之從楚久矣使晉有志於抗楚而服鄭曷若移鞮之役於今日乎移七大夫之勢以迫楚楚必怖移七百乘之兵以伐鄭鄭必服今兵力既盡於齊諸侯既屬於楚而區區樓諸侯於從楚之餘以伐鄭宜其不得鄭也

辛亥葬衛穆公

及六月而葬

二月公至自伐鄭

從晉伐鄭而歸也

甲子新宮災三日哭

新宮宣公之廟也崔氏曰稱新宮者當時之辭也三年喪畢始廟祭矣哀痛之故三日哭也

乙亥葬宋文公

八月而葬

夏公如晉

傳云拜汶陽之田也

鄭公子去疾帥師伐許

岷隱曰左氏載許恃楚而不事鄭鄭子良伐許甚矣  
鄭之不度德也鄭方得罪中國晉帥諸侯伐之鄭當  
恐懼謝罪顧以許不事已遽至興師至冬復伐許木  
訥曰楚越許而後至鄭許弱不能抗楚折而歸之今  
鄭無謀亦折而從之又連年伐許是自撤藩籬以開  
楚寇也

公至自晉

謝得汶陽田而歸

秋叔孫僑如帥師圍棘

棘汶陽之邑齊以歸魯而棘不服故圍之先儒謂本魯故邑而今不肯歸者畏稅畝丘甲之苛政也

大雩

禱雨之祭大者僭也

晉卻克衛孫良夫伐廡咎

如廡在良反  
咎古刀反

晉滅赤狄其餘民散入廡咎如故伐之廡穀梁作牆



公羊作將

冬十有一月晉侯使荀庚來聘衛侯使孫良夫來聘丙午及荀庚盟丁未及孫良夫盟

二大夫同時而聘魯方畏晉待其大夫不敢與列國齒故丙午盟晉丁未盟衛

鄭伐許

程氏曰鄭附於楚一年而再伐許

四年春宋公使華元來聘

傳曰通嗣君也蓋宋共公初立

三月壬申鄭伯堅卒

鄭襄公立十八年卒

杞伯來朝

將黜叔姬先來言其故

夏四月甲寅臧孫許卒

宣叔也臧文仲之子

公如晉

傳載晉侯見公不敬公欲叛晉季文子不可曰晉侯必不免張氏曰晉景公勝齊而驕故魯欲叛之也

葬鄭襄公

三月卒夏而葬速

秋公至自晉

夏如晉而今歸也

冬城鄆

岷隱曰鄆有二東鄆莒邑魯所爭也西鄆魯邑今新

城也定公時齊歸鄆謹龜陰之田杜氏謂此三邑者汶陽之田也魯既得汶陽故城鄆以為固左氏謂欲叛晉而城鄆者非也木訥曰西鄆近齊以為懼齊之復見奪則然矣左氏以為備晉則鄆去晉遠矣鄆公羊作運

鄭伯伐許

鄭於是三伐許矣况今悼公居喪未逾年親自伐許石氏曰父伐人喪子以喪伐人

五年春王正月杞叔姬來歸

內女見出曰來歸

仲孫蔑如宋

蔑孟獻子也如宋報前年華元之聘也

夏叔孫僑如會晉荀首于穀

左氏曰晉荀首如齊逆女故宣伯饋諸穀注穀齊地也岷隱曰魯畏晉故其大夫逆女而僑如饋之首公

羊作秀

梁山崩

梁山韓地晉滅韓故屬晉左氏傳晉召伯宗伯宗以  
重人之言告以山崩川竭君為之不舉

秋大水

書災

冬十有一月己酉天王崩

周定王立二十一年崩

十有二月己丑公會晉侯齊侯宋公衛侯鄭伯曹伯邾

子杞伯同盟于蟲牢

左氏載許靈公愬鄭於楚鄭悼公如楚訟不勝故請成于晉岷隱曰鄭之貳晉久矣一旦請成于晉晉所甚喜故會諸侯以同盟以侈鄭人之服晉景公於是  
有驕泰之心矣蟲牢鄭地

六年春王正月公至自會

去冬同盟蟲牢而今歸也

二月辛巳立武宮

岷隱曰按左氏云季文子以鞶之功立武宮非禮也聽於人以救其難不可以立武如左氏所言則武宮者猶邲之戰潘黨請楚子欲築武庫之類也公羊之說則不然以武宮為武公之宮按明堂位曰魯公之廟文世室武公之廟武世室也岷隱蓋兩存其說木訥曰魯祀周公為太祖伯禽為太室記禮者出於春秋之後見魯立武宮遂有武世室之語蓋不經矣鄭夾祭曰武宮講武之宮自鞶之後四卿出而大得志



故立武宮備戎事也是不以為廟也然愚按武公名  
教伯禽九世孫成公十一世祖若果世室不應中毀  
木訥夾漈之說似矣然昭公十五年有事于武宮注  
云武公廟成公復立則謂武宮非廟不可也或者季  
孫行父以伐齊為功故立武宮以誇如前二義皆兼  
之歟

取鄆

音專

左氏傳注鄆附庸國也公羊以為邾邑未知孰是然

諸家多從左說

衛孫良夫帥師侵宋

左氏載晉帥鄭衛侵宋晉師過衛欲襲衛伯宗止之師還衛人登陴葉石林曰與經絕不相類且晉衛侵宋而反欲襲衛亦首尾自相戾愚按此止當依經文衛師侵宋

夏六月邾子來朝

邾久不朝今朝以修好

公孫嬰齊如晉

嬰齊者叔盼之子子叔聲伯也高閔集注曰晉召之欲使魯伐宋也蓋本左氏說

壬申鄭伯費卒

鄭悼公立二年卒

秋仲孫蔑叔孫僑如帥師侵宋

左氏謂受晉之命而伐之也然去年蔑方報華元之聘今遽為人役而伐之又二子各私其軍潛師侵掠

且宋一辭會晉既命衛伐之又命魯伐之皆非也

楚公子嬰齊帥師伐鄭

討其從晉且鄭新喪而伐之此其為楚也

冬季孫行父如晉

傳謂晉遷新田而賀之也

晉欒書帥師救鄭

左氏載欒書出而楚還趙同趙括欲戰欒書力遏之亦還岷隱曰晉無亡矢遺鏃之費而卒收救鄭之功

主將善御下也救公羊作侵

七年春王正月麇鼠食郊牛角改卜牛麇鼠又食其角  
乃免牛

孫炎曰麇鼠如鼠狼鄭夾漈曰草鼠而微黃愚聞之  
師曰甘口鼠也噬人畜不知痛木訥曰改卜牛而又  
食其角天示譴也說者以為養牲不謹非也天豈享  
僭哉

吳伐鄭

吳今平江府邾今淮陽軍下邳縣相去本隔江淮二水而伐之者吳始大也於是季文子有中國不振旅蠻夷入伐之憂初吳本受盟於楚自楚之申公巫臣沮子重所請之賞田挾子反所欲之夏姬逃於晉而子重子反殺其族巫臣自晉適吳通吳於晉教之射御戰陳以叛楚蠻夷之屬於楚者吳盡取之至是而

又陵中國矣楚之患漸定而吳之擾方始岷隱曰荆之始見也入蔡吳之始見也伐邾中國莫之問故駸

駸馬交亂中國

夏五月曹伯來朝

曹無魯好者再世矣今宣公來朝修舊好也

不郊猶三望

不容郊天而猶祀地此襲用僖公之繆舉也三望之義已見僖三十二年

秋楚公子嬰齊帥師伐鄭公會晉侯齊侯宋公衛侯曹伯莒子邾子杞伯救鄭八月戊辰同盟于馬陵公至自

會

岷隱曰楚再伐鄭晉再救鄭晉侯為之大會諸侯亦能囚楚之鄖公鍾儀以獻於晉其勢可以有為矣伊川曰同盟于馬陵者諸侯同心病楚也時莒初服莒舊服于齊今齊來而莒亦隨之也

吳入州來

州來今壽州下蔡縣故蠻也楚人取之為邑而吳今入之吳楚之爭自入州來始蓋入州來則宋近楚



冬大雩

穀梁曰冬無為雩也或者雩本旱祭魯末俗用為他

祀與

衛孫林父出奔晉

孫良夫專兵而林父世卿故定公惡之而奔七年而  
晉侯強反之於晉終以戚叛則定公惡之是矣

八年春晉侯使韓穿來言汶陽之田歸之于齊

二年行父從晉伐齊取汶陽田齊既敗而事晉故晉

欽定四庫全書

黃氏日抄  
卷十一

十六

又使魯歸之於齊七年之間一予一奪皆制於晉行父私於韓穿曰汶陽敝邑之舊也然不敢爭

晉欒書帥師侵蔡

蔡迫於楚自翟泉與盟之後未嘗從中國盟會文十五年晉卻缺伐之不能反前年晉欒書救鄭因而伐蔡楚師救之不戰而還晉未得志故再侵蔡遂侵楚獲申驪

公孫嬰齊如莒

左氏謂聲伯因聘而逆婦

宋公使華元來聘夏宋公使公孫壽來納幣

來聘者聘共姬也宋公使來納幣者宋公自主之也  
共姬魯成公姊妹為宋共公夫人

晉殺其大夫趙同趙括

葉石林曰趙朔晉侯之壻朔死而同括之弟嬰亂其  
室同括不請於君而放之齊於是朔之室譖於晉侯  
使欒氏卻氏證同括將為亂而殺之愚按同括嬰皆

盾之弟朔盾之子武又朔之子隨朔之室畜於公宮  
祈奚韓厥言於晉侯曰成季之勲宣孟之忠而無後  
為善者懼矣乃立武為趙氏後是無程嬰杵臼之事  
也安有晉侯外孫畜於公宮而待外人抱匿之者哉  
况殺趙氏正朔之室之謀非欲殺朔之子也

秋七月天子使召伯來賜公命

岷隱曰魯十二公獨文成二君身受王命文公拜命  
之後猶能遣叔孫得臣如京師成公無是也後四年

因會伐秦道過京師息汗馬之勞爾愚按魯不請命天子反賜命而魯又不往拜之春秋之世倒置一至於此賜公穀作錫義則同天王天子王者之通稱亦非有異義泰山孫氏云

冬十月癸卯杞叔姬卒

左氏曰來歸自杞故書

晉侯使士燮來聘叔孫僑如會晉士燮齊人邾人伐鄭士燮來聘者以鄭成於吳而請伐鄭也魯於鄭為親

賂使緩兵士變脅之行父懼而使宣伯會伐鄭士變  
曰鄭蕞爾小邦何足以煩二國之謀而重勤四國之  
師哉非難於鄭難於吳也薛氏曰吳伐鄭不能救鄭  
服吳則伐之諸侯無所措手足矣

衛人來媵

諸侯娶一國則二同姓之國往媵之國三人凡九女  
伯姬將嫁故衛來媵伊川謂伯姬賢故書

九年春王正月杞伯來逆叔姬之喪以歸

孫覺經解曰叔姬者杞伯之出妻也杞伯生絕其妻死歸其喪春秋以其非禮書之趙氏曰叔姬絕於杞而卒於魯則宜葬於魯

公會晉侯齊侯宋公衛侯鄭伯曹伯莒子杞伯同盟于蒲公至自會

傳謂歸汶陽之田故諸侯貳于晉晉人懼而會于蒲張氏曰自此執鄭盟魯紛紛甚矣蒲衛地今屬開封二月伯姬歸于宋夏季孫行父如宋致女晉人來媵

岷隱曰伯姬之賢魯人尊之故既歸宋復使上卿致女以撫問其已至晉人來媵亦媵伯姬也

秋七月丙子齊侯無野卒

齊頃公立十七年卒

晉人執鄭伯晉欒書帥師伐鄭

鄭自邲之戰從楚者十年自蟲牢馬陵之會楚方備吳未暇爭鄭鄭在晉者亦五年今年蒲之會鄭方從晉楚以重賂求鄭鄭復會楚于鄧故晉執而伐之然



非禮甚矣適以激鄭之貳

冬十有一月葬齊頃公

五月而葬

楚公子嬰齊帥師伐莒庚申莒潰楚人入鄆

莒今密州在吳魯之東楚越吳魯而伐之國小而潰  
鄆者莒魯所爭之邑楚又乘勝入鄆

秦人白狄伐晉

傳曰諸侯貳故也趙氏曰宣八年晉成以白狄伐秦

今秦桓亦以白狄伐晉狄介秦晉之間惟強者用之  
鄭人圍許

時鄭伯方執於晉而鄭反圍許傳謂此公孫申之謀  
示不急君也岷隱曰豈有君見執外示不急之意反  
興師以伐人有如激晉侯之怒其不重為君累者鮮  
矣按明年鄭伯歸殺申以鄭用其謀改立君也

城中城

注中城東海邑木訥曰楚伐莒入鄆逼近魯故城中

城以備不虞或曰魯之內城

十年春衛侯之弟黑背帥師侵鄭

左氏曰晉命也

夏四月五卜郊不從乃不郊

天之不享僭禮如此

五月公會晉侯齊侯宋公衛侯曹伯伐鄭

鄭用公孫申之謀置其被執之君不問立子縵見殺  
又立髡頑晉欒成子曰鄭人立君我執一人焉何益

不如伐鄭而歸其君以求成焉趙氏曰晉景公欲歸其君而鄭不求欲殺其君而鄭不服故覲顏以合諸侯伐鄭而歸之

齊人來媵

媵伯姬也異姓來媵非禮也

丙午晉侯孺卒

孺乃侯反

晉景公立十九年卒許氏曰當景之世楚莊入陳圍鄭圍宋敗晉于邲中國大絀徒從事亦狄潞氏迨楚

莊沒始得為鞏之役以服齊僅不失霸岷隱曰晉景  
嗣霸數勤諸侯相與同盟一曰斷道二曰蟲牢三曰  
馬陵四曰蒲蒲之盟以歸汶陽之故諸侯貳晉爾木  
訥曰晉自蟲牢始得諸侯宋公一言不順即命魯衛  
伐之既而晉以齊厚於已反前日所取於齊以予魯  
之田復以予齊故諸侯貳晉

秋七月公如晉

公如晉奔喪傳云晉止公送葬諸侯無在者先儒謂

奔喪會葬臣子之事也公自取辱蓋晉以反魯汶陽之田而疑公故辱之

冬十月

書備四時公羊傳無此三字

十有一年春王三月公至自晉

公留晉凡九月始歸

晉侯使郤犇來聘己丑及郤犇盟夏季孫行父如晉

犇尺

由反

公自汶陽之田歸齊欲貳晉而不果然嫌隙已開晉  
因公之朝而止之數月左氏謂公請受盟而後使歸  
卻犖來聘且涖盟季文子報聘亦涖盟也

秋叔孫僑如如齊

傳云宣伯聘齊以修前好張氏謂迫於晉之辱而不  
得已者也岷隱曰晉使我歸田于齊齊未嘗遣使至  
魯是德晉而怨魯也今僑如修好未幾而求昏齊卒  
無報聘則魯為齊弱久矣

冬十月

書備四時

十有二年春周公出奔晉

傳載周公楚惡惠襄二族之逼又與卿士伯與爭政  
怒而出奔王使劉子復之三日復出奔晉是自絕于  
周也

夏公會晉侯衛侯于瑣澤

傳載晉使楚囚鍾儀歸求成於楚宋華元因是合晉



楚之成鄭伯如晉聽成會于瑣澤成故也木訥曰晉厲初立而求諸侯於是為瑣澤之會然所會者魯衛而已左氏載宋合晉楚之成鄭人聽成考之於經無一毫合不知何年之事而左氏誤附也愚謂止憑經文足矣瑣澤公羊作沙澤

秋晉人敗狄于交剛

傳載狄侵晉晉敗之于交剛岷隱曰春秋時狄患最重齊霸之初狄方為患威公不能治也晉霸之衰狄

人微弱晉乃能屢勝之春秋於晉敗狄之事纖悉備書幸中國之猶能自強也

冬十月

書備四時

十有三年春晉侯使卻錡來乞師二月公如京師夏五月公自京師遂會晉侯齊侯宋公衛侯鄭伯曹伯邾人滕人伐秦曹伯盧卒于師秋七月公至自伐秦

傳載秦桓公既與晉厲公為令狐之盟又召狄與楚

欲道以伐晉故晉使呂相絕秦而帥諸侯之師及秦師戰于麻隧秦師敗績張氏曰晉以私怨報秦其義不足以令諸侯故卑辭以乞師諸侯已絕迹於京師一百餘年今因伐秦過周因講朝禮故書如京師而不書朝以見諸侯之行止為伐秦而不為朝王也戴氏曰公無朝王之心道過京師不得已而行朝王之禮書公自京師書公至自伐秦見初心之所存而終事之不可掩也曹伯廬卒于師傳曰閔之也蓋曹宣

公立十七年為晉役而死于行不得其所也

冬葬曹宣公

傳載子臧逆宣公之喪公子負芻居守乃殺其太子而自立既葬宣公子臧將亡國人皆將從之負芻懼告罪且請焉子臧乃反而致其邑子臧賢公子季札所慕而效者也負芻是為成公

十有四年春王正月莒子朱卒

張氏曰莒季佗也

夏衛孫林父自晉歸于衛

林父奔晉已七年衛侯如晉晉侯強見林父定公不可既歸而晉使卻犢送之衛獻之出奔禍根在此衛自元咺以臣抗君皆晉為之矣

秋叔孫僑如如齊逆女

張氏曰逆公夫人也

鄭公子喜帥師伐許

傳載鄭子罕伐許鄭伯復伐許許人平以申叔之封

明年遷于葉避鄭以依楚蓋鄭自成三年再伐許四  
年代許九年圍許今又伐之晉不能救也

九月僑如以夫人婦姜氏至自齊

僑如稱名不稱氏者一事再見因上文也稱婦有姑  
也于時穆姜尚存

冬十月庚寅衛侯臧卒

衛定公立十二年卒

秦伯卒

高閔集註曰秦桓公也立二十八年卒史失其名  
十有五年春王二月葬衛定公

五月而葬

三月乙巳仲嬰齊卒

初東門氏公子遂立宣公有寵其子歸父繼世專政  
謀去三桓未遂而宣公薨三桓逐東門氏歸父奔齊  
魯立嬰齊以後東門氏杜氏注曰立為襄仲子歸父  
之弟襄仲即公子遂之字以字為氏故曰仲嬰齊

癸丑公會晉侯衛侯鄭伯曹伯宋世子成齊國佐邾人  
同盟于戚晉侯執曹伯歸于京師公至自會

傳云會于戚討曹伯負芻也愚按負芻殺世子自立  
是可討也然與之會然後執之若紿而致之非討之  
義張氏曰先執曹伯以令諸侯然後盟之乃盡善也  
夏六月宋公固卒

宋共公立十三年卒

楚子伐鄭



木訥曰前年鄭公子喜無故而伐許許楚之與也鄭昔嘗伐許而楚不問以鄭亦在楚耳今鄭從晉而伐楚之與國楚能不惡鄭乎故楚子伐鄭為許也鄭有以招之也

秋八月庚辰葬宋共公宋華元出奔晉宋華元自晉歸于宋宋殺其大夫山宋魚石出奔楚

左氏曰葬宋共公於是蕩澤弱公室殺公子肥蘇氏曰華元將討之而力不能故出奔奔而國人許之討

然後歸故其討之也族人莫救劉氏曰元自晉歸使  
國人攻桓氏殺蕩山黜魚石國然後定蓋說者謂山  
即蕩澤之名而魚氏與蕩氏皆桓族也木訥曰左氏  
載元之奔也魚石止元于河上而經實書奔晉又載  
魚石請討山既討山則魚石何用奔楚考其言無一  
合於經蓋山與魚石均宋之亂臣故山見殺而魚石  
奔復倚楚而入愚按傳與經異但當信經凡依傳而  
生說以釋經者不必也

冬十有一月叔孫僑如會晉士燮齊高無咎宋華元衛孫林父鄭公子鮪邾人會吳于鍾離

傳始通吳也注鍾離楚邑淮南縣吳始來通晉帥諸侯之大夫會之故殊會趙氏曰先會晉而後會吳殊會也高氏曰吳實夷狄反安坐于鍾離以待中國之會葉氏曰成公之末楚浸衰而吳驟強天下所恃者晉而已反率諸侯而從之一會而合七國再會而合十三國三會而合十二國天下無不聽於吳焉鍾離

楚邑今濠州

許遷于葉

避鄭依楚也傳云楚遷之葉今汝州葉縣

十有六年春王正月雨木冰

范甯曰雨著木成冰

夏四月辛未滕子卒

左氏傳滕文公卒

鄭公子喜帥師侵宋

公子喜穆公子子罕也侵宋伐喪也鄭叛晉從楚故  
為楚侵宋自攻其類也

六月丙寅朔日有食之

書災

晉侯使欒黶來乞師甲午晦晉侯及楚子鄭伯戰于鄢  
陵楚子鄭師敗績楚殺其大夫公子側

鄢陵鄭地也是役也晉呂錡射楚共王中目楚師宵  
遁晉入楚軍三日穀公子側鄢陵之敗帥也楚故殺

之自晉敗于邲楚師橫行中原今厲公一戰而勝之  
洗中國二十餘年之恥岷隱曰鄆陵之戰與城濮同  
功然厲公所以異於文公者一勝之後無以居之觀沙  
隨之不見公季孫行父之見執厲公之志驕矣愚觀  
晉旣敗楚范文子立於馬前曰何以及此君其戒之  
蓋知厲公非保功之君也果難作鄆陵鄭地今開封  
秋公會晉侯齊侯衛侯宋華元邾季沙隨不見公公至

自會

謀欲伐鄭鄭未服也魯叔孫僑如與君母穆姜謀作  
難公至後期故晉不見公沙隨宋地

公會尹子晉侯齊國佐邾人伐鄭

注曰尹子王卿士也木訥曰晉侯敗楚鄭之師于鄢  
陵鄭不反今又以王命伐之

曹伯歸自京師

曹伯負芻殺太子而自立晉侯執而歸之京師欲改  
立賢公子子臧子臧不肯盡致其邑與卿而不出故

負芻復得歸曹木訥曰曹成殺世子而自立幸晉有尊周之心不自裁處而歸曹伯于京師王苟因是而用其威福之柄天下孰不震懾今乃置而姑息之諸侯判然知王法不復行其何忌而不為亂臣賊子哉吾於此重為周王惜之愚按曹伯復歸而不書名諸家說各不同竊意突如其立故出入必書名以為別曹成之位已定三年不待書名為別耳恐無他義

九月晉人執季孫行父舍之于莒邱冬十月乙亥叔孫



僑如出奔齊十有二月乙丑季孫行父及晉郤犇盟于  
扈公至自會乙酉刺公子偃

叔孫僑如與穆姜謀去季孟而取其室使晉因季孫  
在晉殺之而已殺孟獻子於魯故晉執季孫而舍之  
莒丘莒丘晉地也公使子叔聲伯請季孫於晉故晉  
與季孫盟而還之叔孫僑如謀不遂而出奔公歸而  
刺公子偃偃者公之庶弟穆姜謀亂嘗怒公而指偃  
可代公故也僑如既奔齊魯立豹以後叔孫氏莒公

羊作紹

十有七年春衛北宮括帥師侵鄭

左氏以為衛救晉也木訥曰使晉被鄭兵而衛救之則有援霸王之功何得不書而書侵耶愚謂此經文之所無但據經文謂衛侵鄭足矣

夏公會尹子單子晉侯齊侯宋公衛侯曹伯邾人伐鄭  
六月乙酉同盟于柯陵秋公至自會

葉石林曰單子王之中大夫也王大夫前未有二人

臨諸侯者此言尹子單子鄭恃楚不服晉復請於王而益之也王命而行一人可矣命而不行雖益何補趙木訥曰以七國之衆加以王師而鄭未反故遂與柯陵之盟戴岷隱曰前此諸侯屈天子之卿為會者有之未有屈二卿者屈天子之卿為盟者有之未有同盟者厲公之志驕僭甚矣

齊高無咎出奔莒

左氏載慶克通于靈公母聲孟子蒙婦人衣乘輦而

入鮑牽見而告國武子武子召慶克而謂之克以告  
夫人怒及國子相靈公會而歸孟子譖高鮑將不納  
君而立公子角且譖國子亦知其謀故公別鮑牽而  
逐高無咎無咎奔莒弟高弱奔盧

九月辛丑用郊

木訥曰魯之卜郊自成公始而用郊自成公始蓋前  
此雖以史遜請之平王得用郊猶疑其僭而卜之未  
遽用也成公七年卜之不從乃免牛十年又嘗卜之

五卜不從遂不郊今成公懼卜而不從則終不得郊故不復卜而直用之聖人書曰用郊蓋前此未嘗用也至定哀之郊則不復書用蓋責不在定哀其用之始於成公用與用田賦用致夫人同謬者求其說而不得遂以為用人其支離一至是哉

晉侯使荀瑩來乞師冬公會單子晉侯宋公衛侯曹伯齊人邾人伐鄭十有一月公至自伐鄭

傳載諸侯伐鄭楚救鄭諸侯還晉至此再假王命三

合諸侯以伐之而不能服

壬申公孫嬰齊卒于狸脤

狸力之反  
脤市軫反

公孫嬰齊叔盼之子子叔聲伯嘗請行父於晉者也

與前仲嬰齊同名耳卒于狸脤者從公伐鄭還而道  
卒脤公羊作軫穀梁作蜃

十有二月丁巳朔日有食之

書災

邾子貜且卒

釐且立四十年卒

晉殺其大夫卻錡卻犇卻至

左氏載晉厲公侈多外嬖反自鄆陵欲盡去羣大夫而立其左右胥童嬖而怨卻氏請必先三卻遂殺之皆尸諸朝又以甲劫樂書中行偃於朝穀梁曰禍於是起

楚人滅舒庸

任氏曰舒庸東夷偃姓之國左氏曰舒庸以楚師之

敗道吳人圍巢故楚滅之

十有八年春王正月晉殺其大夫胥童庚申晉弑其君

州蒲

傳載樂書中行偃殺胥童又使程滑弑厲公而迎立  
周子年十四是為悼公蓋胥童實道厲公殺三郤又  
親劫樂書中行偃故二人殺胥童繼弑厲公近世張  
洽受春秋於朱文公者也其集註謂聞之師曰稱國  
以弑者衆弑其君之辭也曷為不言二臣弑之孟子



論貴戚之卿君有大過則諫反覆之而不聽則易位  
厲公之過大矣昵用小人殺戮無辜舉朝諸卿不保  
首領書偃晉之世臣以社稷為心尚可行易位之權  
而遽弑之夫二人嘗以君事之矣故稱國以弑分其  
惡於衆也悼公逐不臣者七人而不誅書偃非里克  
甯喜之比故也木訥趙氏曰厲公之興哆然修文襄  
之業敗狄伐秦既如其志當吳楚並興欲抗吳則畏  
楚欲抗楚則慮吳遂合諸侯以會吳于鍾離蓋疑吳

楚合則中國無以抗之也吳既我附明年遂興鄢陵  
之師大敗楚鄭謀亦深矣然晉雖得志而鄭不反是  
時不退而修德乃遷怒魯之後至沙隨之會不見公  
既而上屈王師下連諸侯三疾于鄭鄭不能得忿無  
所洩內疾卿佐立其朝者僂然如不終日故中行樂  
氏之逆成嗚呼剛暴之君可不監哉愚按張氏詳其  
一時取禍之患趙氏詳其平日紹霸之勤故并錄以

備參考

齊殺其大夫國佐

慶克通乎君母君母怒國子之謫克也譖國子既而慶克以君命圍高弱於盧國子往殺慶克于盧師以穀叛齊侯與盟于徐闕而復之既叛而復仕其朝故齊侯殺之于內朝之宮然齊侯使慶克之子慶封為大夫則又稔禍矣

公如晉

晉悼公嗣位而朝之也

夏楚子鄭伯伐宋宋魚石復入于彭城

宋華元討桓族而魚石奔楚故魚石借楚之力伐宋而復入彭城彭城宋邑也

公至自晉晉侯使士匄來聘

公方朝晉晉隨使范宣子來謝其朝晉悼公交鄰有道如此

秋杞伯來朝八月邾子來朝

傳稱杞桓公來朝勞公且問晉故邾宣公初即位而

來見

築鹿圃

杜氏注築墻為鹿苑

己丑公薨于路寢

正也

冬楚人鄭人侵宋晉侯使士魴來乞師十有二月仲孫  
蔑會晉侯宋公衛侯邾子齊崔杼同盟于虛打

魴音房  
打他丁

反

晉謀救宋也諸侯師至而楚鄭之師已退晉侯新立  
因為同盟

丁未葬我君成公

五月而葬

成公立以正薨以正世適承嗣國家無事魯自春  
秋以來惟成公一人而已然作丘甲始用郊其失  
不少又內制於行父掃四大夫之師以報歸父謀  
去三桓之怨外制於強晉得汶陽之田而復見奪

弔景公之喪而輒見止如沙隨之會而不得見亦  
惴惴度日爾

襄公

名午成公之子母定姒謚法因事有功曰襄

元年春王正月公即位

於是襄公年四歲

仲孫蔑會晉欒黶宋華元衛甯殖曹人莒人邾人滕人  
薛人圍宋彭城

魚石自宋逃楚楚伐宋而納魚石於宋之彭城此去  
年之夏也至冬又復侵宋蓋既已納魚石據宋一邑  
因為荐食之謀未已也時晉悼公以十四歲新立即  
會諸侯之師以救之師至而楚師還宋因辭諸侯而  
請其師圍彭城至是晉大夫帥諸大夫共圍之彭城  
降晉晉以魚石之族五大夫在彭城者歸而寘諸鄆  
邱於是彭城復為宋有木訥曰伐叛討逆霸王事也  
悼公之興首合諸侯之大夫為宋圍彭城討魚石得



其職矣宜列國和會而願奉其職也

夏晉韓厥帥師伐鄭仲孫蔑會齊崔杼曹人邾人杞人次于鄆秋楚公子壬夫帥師侵宋

鄭從楚伐宋者也晉既救宋矣故以次伐鄭諸侯之師次于鄆者為之援也鄆鄭地也楚之侵宋者攻晉之所救也胡氏曰楚人釋君助臣事已悖矣晉降彭城以魚石歸遂伐鄭而以諸侯次鄆援之放義而行者也戴氏曰韓厥身自伐鄭而諸侯不與焉亦見晉

悼公圖霸之初使大夫身親其勞不敢勤諸侯之師  
若此宜其能成霸也趙氏曰中國伐鄭屢矣必連諸  
侯之師今悼公之圖鄭亦可謂有謀矣以韓厥獨攻  
其前以五國之兵援其後楚兵不出則一韓厥足以  
敵鄭而有餘楚兵出則五國之師足以鬪楚而不懼  
此皆所以謹用諸侯而不忍輕鬪其民也許氏曰楚  
人侵宋攻晉所救而諸侯之師卒不為動則有以量  
楚力之所至矣韓厥公羊作韓屈鄆公羊作合

九月辛酉天王崩

簡王在位十四年崩

邾子來朝冬衛侯使公孫剽來聘晉侯使荀瑩來聘

岷隱曰歷考十二公即位之初朝聘鄰國者有矣鄰國未有先來聘者獨襄公為然意晉悼初立屈已交諸侯當次鄆之役晉侯衛侯實次于戚以為之援故謀而聘魯然愚按先儒皆以天王崩不奔喪而朝聘於魯為非此又正本之論而春秋時習俗之所不識

者也若邾之來朝則高氏謂公方四歲安能以禮相接然則此殆禮之贅又非來聘者比也

二年春王正月葬簡王

五月而葬速天子七月而葬

鄭師伐宋

左氏曰楚令也木訥曰鄭成公為人固而不知機彼鄭文鄭襄不幸無霸主楚兵脅之姑從楚以紓國患而已成公之初堅附中華一折而從楚則至死不變

晉厲敗楚師三以諸侯伐鄭鄭可歸矣反受役於楚以戕中國愚謂晉厲猶以力服之也今楚納宋之叛臣晉悼公伐其叛臣而取之義聲震夷夏逆順曉然矣何為尚為楚而伐宋耶

夏五月庚寅夫人姜氏薨

成公夫人齊姜也

六月庚辰鄭伯論卒

論古困反

成公立十四年卒左傳載其臨死不忍背楚之言高

氏曰不言葬者以成公背中國諸侯不會其葬也許氏曰夫鄭豈以中國為終可畔既蒙楚之德遂不可反是以君子貴謀始也

晉師宋師衛甯殖侵鄭

木訥曰侵淺事也合三國之師於鄭郊而侵之要其服而已非志於伐也說者以為鄭方在喪伐喪為不義吾以為鄭成終身陷於左衽而不反以楚之誘之也今新君即位苟一朝乎楚為楚所化則亦未易歸

也故以兵侵之要其速從中國而已非伐喪也愚聞  
之先師亦曰三國成師以出不以伐而以侵者正避  
鄭之喪也晉悼公豈伐喪者哉

秋七月仲孫蔑會晉荀瑩宋華元衛孫林父曹人邾人  
于戚

左傳載會于戚謀鄭也孟獻子請城虎牢以逼鄭知  
武子曰善齊崔子今不來矣滕薛小邾之不至皆齊  
故也將復於寡君而請於齊於是今年冬戚之會齊

滕薛小邾皆至遂城虎牢木訥曰合六國之大夫而  
不加侵伐謀所以服之之術而已晉所以皇皇然速  
於得鄭者蓋鄭僖初立倘一為楚所羈則未可以文  
告致是機會之不容失者不然一歲之間三合兵車  
何諸侯之不憚煩哉

巳丑葬我小君齊姜

杜氏曰齊謚也三月而葬速

叔孫豹如宋



左氏曰通嗣君也杜氏曰豹僑如之弟也木訥曰叔孫氏自公孫茲叔孫得臣再世為卿至叔孫僑如其橫滋甚反譖成公及季孫行父於晉事敗奔齊叔孫之黨沮矣今襄公即位幼未能君盟會征伐專於仲孫蔑蔑者孟獻子而季孫行父為正卿則耄矣故叔孫復出而任聘問之事豹得臣之次子也

冬仲孫蔑會晉荀瑩齊崔杼宋華元衛孫林父曹人邾人滕人薛人小邾人于戚遂城虎牢

齊滕薛小邾聞知武子之言故皆來會既城虎牢鄭人乃成呂氏曰城虎牢所以服鄭而拒楚鄭服則楚自遠荀瑩城之是也非取其地而有之也故不繫之鄭陸淳曰城虎牢可以安中國息征伐故聖人許其取而不繫之鄭張氏洽曰虎牢所以不繫鄭者鄭背華即夷黨楚以為中國患悼公動天下之諸侯以討之而負固自若故從孟獻子之謀城其巖邑以制之以伯主討不服之國地非鄭之所可私此春秋明王

制以示予奪之正也木訥趙氏曰安一國之功小安天下之功大晉悼初圍宋彭城為宋治叛臣爾其利不及天下此一國之功也晉楚爭鄭五十年乍叛乍服惟強是從鄭成一叛入楚而終身不復反以一鄭不服天下諸侯為之不寧兵車之會無日而置今晉悼謀制鄭之策而城虎牢虎牢古號國鄭得之為制邑至是為虎牢在漢為成臯今為孟州汜水縣巖險聞於天下楚鄭倚之以抗中國今晉率十國之大夫

取而城之虎牢既非鄭有鄭何恃以抗中國哉故雞澤之盟鄭不伐而自至八國之君同泣是盟而天下無兵車者六年則虎牢之城誠有功於天下此天下之功也愚按此役諸儒多責鄭不能自守其險而反為晉取然使鄭能守此險則為楚以戕中國今晉取此險則可拒楚以安中國諸儒之為此說者豈不知夷夏之辨耶何不責鄭之不從晉反責鄭之不守險也

楚殺其大夫公子申

左傳載公子申為令尹多受小國之賂以逼子重子辛故楚人殺之

三年春楚公子嬰齊帥師伐吳

傳載楚子重伐吳克鳩茲至于衡山而吳取其駕獲鄧廖駕良邑廖亦楚之良所獲不如所亡木訥曰夷狄相攻中國之福稽其故則自晉厲公會吳於鍾離實有謀焉鍾離一會而吳無仇晉之心楚有患吳之

意故楚之伐吳以吳不與已而與中國也楚之兵力既分於吳而不能專向中國此諸侯之患得以少紓吳既受楚兵則亦不能無求於中國故五年戚之會吳不召而自至自是天下之勢遂成鼎足晉吳楚是也吳既附中國則楚實孤終春秋之世楚無一日安枕者吳倚其東也

公如晉夏四月壬戌公及晉侯盟于長檣公至自晉如晉者朝霸主也公時方六歲相其行者孟獻子也

蘇氏曰晉侯修禮於諸侯故去其國都與公盟于長  
檇張氏曰長檇近晉之地也

六月公會單子晉侯宋公衛侯鄭伯莒子邾子齊世子  
光已未同盟于雞澤陳侯使袁僑如會戊寅叔孫豹及  
諸侯之大夫及陳袁僑盟秋公至自會

木訥曰悼公晉之賢君也其所以霸諸侯之效在得  
陳得鄭而已陳鄭即楚久矣今興虎牢之役隻矢不  
遺而鄭來陳見鄭來而恥獨為夷亦遣袁僑如會然

鄭以君會而陳以臣至雞澤之盟以諸侯盟鄭之君  
戊寅之盟以大夫盟陳之臣蓋鄭伯之來既與盟矣  
袁僑至而無以質之則懷附之心不固苟復自與之  
盟則袁僑實抗而霸權不尊故以大夫盟之則晉無  
屈已之辱僑無抗君之罪禮甚安而分甚明此吾所  
以見悼公之賢也論者乃謂諸侯在而大夫盟為大  
夫之專不知大夫奉君命而盟袁僑何得為專愚按  
此役說者又責其不當盟單子竊意齊桓始假王人



為重故首止葵丘會王人而不敢同盟世變日降晉厲之世王人之同盟屢矣久而自同於列國今不待請而自至習俗既成雖以悼公之賢不知革其非此可為世變歎爾

冬晉荀瑩帥師伐許

許自新城以來不預中國盟會四十餘年矣今晉以陳鄭既服而伐許木訥曰許為鄭虐遷于葉以避葉逼楚倚楚為重必不能近叛楚而遠事晉晉必能興

召陵之師以服楚則許可得不然徒伐之無益矣

四年春王正月己酉陳侯午卒

陳成公立三十年卒木訥曰陳成歸而卒於中夏諸侯會葬之賢於鄭成遠矣高氏集註曰元經有言日月之逝改于尸尚未晚也陳成公既為雞澤之盟而卒則是國已變於夏矣曾子曰吾何求哉

夏叔孫豹如晉

左氏曰穆叔如晉報知武子之聘也

秋七月戊子夫人妣氏薨

妣杞姓襄公妾母也妣公羊作弋注莒女也

葬陳成公

五月而葬

八月辛亥葬我小君定妣

杜氏曰定諡也踰月而葬速許氏曰傳載季文子不欲以夫人之禮葬定妣志復古也不得已於人言而卒夫人之觀此踰月而葬蓋禮略也鄭夾漈曰旣君

則母同正矣然適母薨而後可得伸其尊也如公羊  
作弋

冬公如晉

左氏載請晉以鄆屬魯也時公方七歲蓋代其言者  
孟獻子也

陳人圍頓

頓小國也傳載楚使頓間陳而侵伐之故陳人圍頓  
木訥曰頓楚之與也陳初從中國而遽圍頓故明年

楚伐陳

五年春公至自晉

去年冬如晉求鄆今始歸魯

夏鄭伯使公子發來聘

公子發者子國也子產之父鄭僖新立使來通好

叔孫豹鄆世子巫如晉

去年冬魯求鄆於晉故今穆叔率鄆世子同如晉以成屬鄆此左氏說也公羊則謂鄆迫於莒故魯率之

通晉愚恐兩說俱有之

仲孫蔑衛孫林父會吳于善道

左氏載吳使壽越如晉請聽諸侯之好故魯衛俱受  
晉命往會之善道公穀皆作善稻云吳地也木訥曰  
吳晉將為戚之會而魯衛實鄰於吳故晉命以通好  
焉許氏曰晉楚爭衡權之在吳故晉急吳如此

秋大雩

旱祭之僭者也

楚殺其大夫公子壬夫

楚忿陳之復歸于晉也咎令尹子辛之侵欲於陳故殺之

公會晉侯宋公陳侯衛侯鄭伯曹伯莒子邾子滕子薛伯齊世子光吳人鄆人于戚公至自會

左氏曰會吳且命戍陳也木訥曰鍾離之會書會以會晉率諸侯往會吳也戚之會不殊會吳晉兩欲而為是會也陳鄭歸晉楚方內憤殺公子壬夫將有疆

場之事此晉所以願求於吳也吳既與晉楚公子嬰齊嘗帥師伐吳此吳所以願交於晉也吳晉同欲故十四國之君歡然相濟

冬戍陳

知楚將伐陳故諸侯以兵戍

楚公子貞帥師伐陳公會晉侯宋公衛侯鄭伯曹伯齊世子光救陳十有二月公至自救陳

諸侯雖戍陳而楚猶伐之故諸侯又親救之楚殺其



令尹而出兵晉范宣子預有失陳之憂諸侯以兵戍陳已非上策戍又不足以禦則事亦極矣

辛未季孫行父卒

行父相三君其卒也無衣帛之妾無食粟之馬無藏金玉無重器備左氏稱其忠於公室然行父怨歸父之謀去三家至掃四大夫之兵以攻齊方公子遂弑君立宣行父實再為之如齊納賂又帥師城莒之諸鄆二邑以自封植其為妾馬金玉也多矣柄及其子

益專且叛然則小廉者乃其大不忠之飾歟向使淫侈如齊慶封適足以殺其身烏能成其私也哉

六年春王三月壬午杞伯姑容卒

高氏集註曰自僖公二十三年杞子卒後杞桓公繼立凡七十有一年呂東萊曰杞入春秋至此始名邾滕杞微國其卒或名或不名國微不備禮乎

夏宋華弱來奔

左氏載華弱與子蕩少相狎長相優又相謗子蕩以

弓楛華弱于朝平公見而逐之亦逐子蕩

秋葬杞桓公

杞始書葬始能通也

滕子來朝

左氏謂滕成公始朝公也

莒人滅鄆

鄆間於魯莒之間前此邾莒伐鄆魯救之有狐駘之  
敗前年魯請於晉以鄆屬魯叔孫豹嘗以鄆世子同

如晉矣去年秋復以屬鄆為不利而辭之蓋以力不能及鄆也至今莒遂滅鄆呂氏曰莒鄆小國自相滅亡晉悼公為時盟主亦莫之卹蓋是時禮義衰絕滅國弑君皆目見之熟不以為甚異故雖晉悼號為賢君亦莫能正也愚按莒之滅鄆春秋具有本末穀梁乃以鄆立莒之子為子謂神不歆異姓之祀為滅雖胡安國獨宗其說而劉氏孫氏戴氏皆嘗辨其非劉曰若鄆取莒為後罪在鄆子不當但責莒人孫曰立

異姓而遂書滅不惟於義不明亦何以為訓此蓋莒人因鄆不順其立異姓而滅之爾戴曰鄆請屬於魯則鄆之勢迫矣莒既滅鄆季孫宿如晉見魯之不能救鄆也莒人滅鄆勢所必至

冬叔孫豹如邾

左氏曰穆叔如邾聘且修平謂平四年狐駘之戰

季孫宿如晉

宿季孫行父之子也左氏謂莒滅鄆故來討宿遂如

晉然魯雖嘗請屬郟既而辭之矣滅郟者莒也晉不問莒而反問魯何耶木訥曰宿父喪未朞而執使命知世卿以固位而已襄公幼弱蓋非公意宿自為之愚聞之師亦謂宿嗣執政往見以植私交

十有二月齊侯滅萊

齊圖萊久矣自宣七年伐萊至是遂滅之萊姜姓例稱滅同姓書名今齊滅萊不名則例之說不通矣

七年春鄭子來朝

鄭自出伯姬不通於魯成公嘗會晉伐之今始來朝  
公

夏四月三卜郊不從乃免牲

孟獻子歸咎於既耕而卜蓋不知天之不歆其僭也

小邾子來朝

此小邾穆公也其先邠黎來顓頊之後王命為小邾  
至是三朝魯

城費

音祕

欽定四庫全書

黃氏日抄  
十一

五

季武子城其私邑以自強定公十二年所欲墮之而不可得者也費今沂州費縣

秋季孫宿如衛

傳以為報子叔之聘然子叔之聘七年矣宿初執政疑自締私交也

八月螽

蝗也書災

冬十月衛侯使孫林父來聘壬戌及孫林父盟



左氏謂報季孫宿之聘且尋孫良夫之盟

楚公子貞帥師圍陳十有二月公會晉侯宋公陳侯衛侯曹伯莒子邾子于鄆鄭伯髡頑如會未見諸侯丙戌

卒于鄆陳侯逃歸

鄆于執切  
鄆七報反

楚圍陳諸侯謀救之陳侯畏楚而逃故不成救鄭伯卒于行三傳皆以為見弑然且當以經為正此鄭僖公也立五年卒頑公穀作原鄆作操

八年春王正月公如晉

傳云公如晉朝且聽朝聘之數

夏葬鄭僖公

五月而葬王氏曰傳載子駟弑公然諸侯方會其郊子駟其敢然乎觀九年與晉爭盟詞不少屈而晉人不以為討其不為不義可見矣蓋子駟為政多殺羣公子疾之者衆因公卒于外而誣之黎氏曰若君實被弑以疾赴遂從而書之則弑君豈有以實告者乎趙氏曰若實弑而書卒是春秋庇逆賊也

鄭人侵蔡獲蔡公子燮

僖公方葬鄭乃侵楚之與國以挑釁此子產所以獨憂而不旋踵致楚之師燮穀梁作濕

季孫宿會晉侯鄭伯齊人宋人衛人邾人于邢邱公至自晉

趙氏曰晉既失陳而為是會以觀諸侯諸侯皆以大  
夫聽命晉之霸業隳矣孫氏曰邢邱之會公在晉晉  
侯不與公會而與季孫宿會襄公微弱政在季氏也

莒人伐我東鄙

左氏曰莒人伐我東鄙以疆鄙田蓋鄙在魯東其田接於魯而經界不明故伐我以正之魯既無鄙世有莒患矣愚按此莒人以兵滅鄙明矣孰謂以其子繼鄙為滅鄙耶

秋九月大雩

為旱禱也大則僭矣

冬楚公子貞帥師伐鄭

討其侵蔡也自是鄭又與楚平王帛待于二竟惟强者是從

晉侯使士匄來聘

左氏曰晉范宣子來聘且拜公之辱告將用師于鄭九年春宋災

天火曰災

夏季孫宿如晉

報范宣子之聘也

五月辛酉夫人姜氏薨秋八月癸未葬我小君穆姜

成公之母襄公祖母也

冬公會晉侯宋公衛侯曹伯莒子邾子滕子薛伯杞伯  
小邾子齊世子光伐鄭十有二月己亥同盟于戲楚子

伐鄭

戲許  
宜反

左氏載諸侯伐鄭將修器備盛餼糧歸老幼居疾于  
虎牢鄭人恐乃行成然子駟爭盟欲惟有禮與强者  
是從既盟而楚伐鄭鄭又與楚平蓋玉帛待二竟此

鄭之素謀子駟尤力主從楚之說也先師嘗謂其無  
夷夏之辯趙木訥則謂晉欲得鄭當先制楚制楚當  
先結吳以倚楚楚忌吳之斷其後必不敢長驅鄭郊  
愚謂鄭處晉楚之間亦難矣晉不幸而遇楚之強謀  
所以安中國亦難矣

十年春公會晉侯宋公衛侯曹伯莒子邾子滕子薛伯  
杞伯小邾子齊世子光會吳于柤夏五月甲午遂滅偃

陽公至自會

桓莊  
加反

相楚地吳子壽夢在相晉悼公會諸侯以往會之先  
師謂晉方患楚欲通吳而吳道多阻今會於彭城之  
相所以道吳之來路趙氏謂會吳所以倚楚倚楚所  
以爭鄭相之會吳既向晉楚恐吳之議其後故晉兩  
合諸侯以伐鄭鄭果如蕭魚之會石氏曰蕭魚之後  
楚專事吳不復爭鄭矣偃陽妘姓小國左氏載晉取  
之欲以封宋之向戌向戌辭而以歸之宋許氏曰涉  
楚會吳而因道以滅人之國中國之禮義盡矣何以



昭格荒服

楚公子貞鄭公孫輒帥師伐宋晉師伐秦

木訥曰楚既得鄭則兵及於宋勢也楚鄭伐宋晉不救宋而伐秦以報私怨非所以霸也先師則曰楚取彭城欲以梗晉晉滅偃陽則楚不得而問彭城偃陽歸宋故楚連鄭師以伐宋去年秋秦嘗乞楚兵以侵晉而楚為之援今晉師伐秦亦悼公制楚之規模也覺此說尤長

秋莒人伐我東鄙

鄆為莒得故莒再伐我東鄙

公會晉侯宋公衛侯曹伯莒子邾子齊世子光滕子薛伯杞伯小邾子伐鄭

鄭黨楚伐宋故晉侯率諸侯伐鄭鄭不服故再戍虎牢齊世子光人臣也而今位滕薛之上以其先至而躋之也非禮矣

冬盜殺鄭公子駢公子癸公孫輒

盜一日而殺三大夫鄭無政刑矣左氏載子駟侵司氏堵氏侯氏子師氏田故五族聚羣不逞之人而殺之子駟駢之字也趙氏謂子駟當國鄭受兵無虛歲宜其禍生肘腋張氏謂鄭之從楚以勞中國皆公子駢之罪公子發公孫輒惟駢是從惡積而不可掩鄭不能討而盜得殺之所謂上慢下暴而致寇至孔子以為盜之招也所以不稱殺其大夫駢公穀作斐

戊鄭虎牢楚公子貞帥師救鄭公至自伐鄭

左氏載諸侯之師城虎牢而戍之鄭及晉平楚子囊  
救鄭晉荀瑩曰我實不能禦楚鄭何罪不如還也楚  
人亦還前城虎牢不言鄭此戍虎牢而繫之於鄭者  
黎氏云城則取而城之故經有城楚丘城緣陵皆不  
繫之國戍者以兵守衛之故經有戍衛戍陳皆繫之  
國先師王氏云城虎牢不繫之鄭者時鄭從楚中國  
取其虎牢而城之為中國守險以制鄭非為鄭而城  
之也戍虎牢而繫之鄭者時鄭已從晉中國恐楚伐

鄭故置兵守衛以拒楚是為鄭而戍之也此說尤明白

十有一年春王正月作三軍

此季氏欺襄公幼弱始三分公室而三家各有其一也然周禮有大國三軍之說諸儒多謂三軍乃魯之舊而今以為作劉氏意林曰至襄而作三軍明襄之前未有三軍也及其舍之也又曰舍三軍明二軍猶在也孫復發微曰大國三軍次國二軍魯以次國而

作三軍亂聖王之制也此一說也謂魯舊止二軍今始分而三之也葉石林曰僖公之詩曰公徒三萬此三軍之數也至成公而季孫行父臧孫許叔孫僑如公孫嬰齊以四卿見於鞏之戰則有加於三軍也鄭夾漈曰宣成以來魯有五卿卿專一軍及季氏逐東門氏而立嬰齊又將逐臧孫紇而立臧為東門與臧氏二家弱而不能軍其民故三家分為三軍而專之此又一說也謂魯舊不止三軍今始并而三之也二

說未知孰是然前一說以周之舊制言後一說以魯之強僭言恐春秋時無復守周制若強而僭者則魯卿大夫之實也在來者考焉

夏四月四卜郊不從乃不郊

崔氏曰郊之用辛也卜上辛不吉則卜中辛又不吉則卜下辛三卜不從則已矣四卜過也然崔氏之說以郊之常禮言而魯之卜不從乃天之不歆其僭也

鄭公孫舍之帥師侵宋公會晉侯宋公衛侯曹伯齊世

子光莒子邾子滕子薛伯杞伯小邾子伐鄭秋七月己未同盟于亳城北公至自伐鄭楚子鄭伯伐宋公會晉侯宋公衛侯曹伯齊世子光莒子邾子滕子薛伯杞伯小邾子伐鄭會于蕭魚公至自會楚人執鄭行人良霄按左氏所載鄭之侵宋者鄭子展謀欲從晉故伐宋以致諸侯之師而後與之也諸侯伐鄭而同盟于亳城北者時鄭方行成故盟諸侯使毋貳也楚子鄭伯又伐宋者楚未知鄭之陰已附晉尚率鄭以伐宋而



鄭姑從之也晉又會諸侯伐鄭而會于蕭魚者鄭於是始決於從晉也楚執鄭行人良霄者鄭已從晉使告于楚楚無以制之而姑執其行人以泄憤也夫鄭自公子駢公子發公孫輒三人決於從楚故鄭歲歲受晉楚迭至之兵三子既為盜所殺子展當國改謀從晉知所向背矣然不即安於晉必伐宋致師待晉師再伐已而後藉以絕楚恐非謀國之要策若晉悼極力求鄭卒成蕭魚之會則霸功之盛也趙氏曰蕭

魚之役楚疲於外鄭服於內寸兵不折隻牲不軟悼公所以制楚服鄭之功豈下於威文耶戴氏曰蕭魚之會晉赦鄭囚納斥堠禁侵掠是舉也可為春秋盛德事比於召陵有光焉書楚執良霄於蕭魚之下見鄭人之心已服楚人之力不競晉悼之功為不爭也程氏曰鄭不可信晉悼公推至誠以待人信之不疑自此鄭不背晉者二十四年師氏曰諸侯之無時暫寧者皆鄭之由也至悼公用魏絳之謀和戎以收五

利之功息民以致三駕之勝遂能再合十二國之師以肆伐而鄭之君臣始無二志振諸夏之威奪強夷之勢是可嘉矣按去年秋會諸侯伐鄭者晉悼公之初駕也今伐鄭而盟于亳城北者晉悼公之再駕也伐鄭而會于蕭魚者晉悼公之三駕左氏曰晉侯謀所以息民三駕而楚不能與爭者此也亳公穀作京冬秦人伐晉

報去年之役且秦景公之妹為楚共王夫人故為楚

伐晉然楚既無以爭鄭秦亦安能黨楚左傳書晉敗績而經不書者無傷晉之大體也

十有二年春王三月莒人伐我東鄙圍台季孫宿帥師救台遂入鄆

莒五年之間三伐魯魯未暇治之今又圍魯邑故季氏既救吾邑遂入莒邑以報之也自穀梁稱受命而救台不受命而入鄆諸家自此爭攻季孫之生事夫季孫固可責也然魯皆季孫為之也入鄆固不受命

救台亦果受命者乎放飯流歎而問無齒決穀梁之謂矣莒小夷也滅郟而遂伐魯歲歲不已季孫之施報方略與相當此事莒可罪而於季孫固未暇議也夏晉侯使士魴來聘

鄭人既服遣使以謝伐鄭之師此晉悼公待諸侯有禮也

秋九月吳子乘卒

吳壽夢立二十五年卒吳至壽夢始大楚畏吳之議

其後始不敢肆擾中國

冬楚公子貞帥師侵宋

鄭不可得而楚姑泄憤於宋楚於是無能為矣

公如晉

拜士魴之聘此事霸之禮也

十有三年春公至自晉

去冬如晉報聘而今始歸也

夏取邾

音詩

邾附庸小國也左氏稱邾亂分為三魯師救邾遂取之先師謂季氏柄國兼地自廣也許氏曰晉始息民是以楚侵宋不報魯取邾不討取無大亂而已邾公羊作詩

秋九月庚辰楚子審卒

楚共王立三十一年卒自以嘗敗于鄢欲謚以靈若厲

冬城防

次定四車全書

黃氏日抄

卷七

高氏集註曰防臧氏之邑也厥後齊高厚伐我北鄙  
圍防則城防者畏齊也木訥趙氏曰魯有二防一近  
宋隱十年伐宋取防是也一近齊隱九年公會齊侯  
于防是也魯既事晉而外齊懼有齊師故城防以備  
之明年齊卒有圍成之役用是知城防以備齊也

十有四年春王正月季孫宿叔老會晉士匄齊人宋人  
衛人鄭公孫蠆曹人莒人邾人滕人薛人杞人小邾人  
會吳于向



時吳壽夢已卒所會者吳新君諸樊也左氏載吳敗於楚告于晉向之會為吳謀楚也范宣子數吳之不德也以退吳人任氏曰晉侯始汲汲會吳將以謀楚也鄭國既服楚隙亦解故諸侯不會但使大夫自是之後歷襄昭之世不復與吳會然則會吳非晉所欲也趙氏曰悼公賢君豈安於事夷狄哉方內有所賴勢不得已也

二月乙未朔日有食之

書災

夏四月叔孫豹會晉荀偃齊人宋人衛北宮括鄭公孫  
蠆曹人莒人邾人滕人杞人小邾人伐秦

左氏曰諸侯之大夫從晉侯伐秦以報櫟之役也木  
訥曰用諸侯之兵以報已怨非也然自是一伐秦終  
春秋之世秦不敢復侵晉

己未衛侯出奔齊

傳載衛獻公戒孫林父甯殖食而弗食二子作亂立

公孫剽出奔

莒人侵我東鄙

注曰報入鄆也木訥曰季孫宿入鄆非兵首也而莒猶以為憾侵我東鄙報入鄆之役焉彼小國逞忿安辯曲直之理至十六年魯訴於晉溴梁之會晉人執而釋之然後少悛故二十年為向之盟而魯始無東鄙之患矣

秋楚公子貞帥師伐吳

石林曰經書楚伐吳而已傳稱吳敗楚師于臯舟不足據木訥曰楚康即位修先君之怨謂楚不得志於中國者吳實為之梗故置宋鄭不問而首伐吳其謀尤出共王之上矣

冬季孫宿會晉士匄宋華閱衛孫林父鄭公孫蔓莒人邾人于戚

左氏載衛孫林父逐衛獻公衎而立剽晉侯以問荀偃對曰不如因而定之衛有君矣故會于戚以定剽

戚衛地也林父之邑也木訥曰釋賊不誅反定剽位  
何賴於霸王哉愚按荀偃本亦弑賊故為逆賊林父  
謀而成其亂於林父之私邑凡今年春列國之會于  
向者大半不至亦可見人心之公而晉悼坐荀偃之  
誤不少矣自是至剽弑而衍歸衛有二君者十年皆  
晉實為之也以悼公之賢而有此惜哉蓋公怠矣明  
年遂薨

十有五年春宋公使向戌來聘二月己亥及向戌盟于

劉

傳稱向戌來聘且尋盟許氏曰不盟于國而盟于劉崇向戌也公弱甚矣張氏曰劉魯地

劉夏逆王后于齊

注劉夏天子之士也傳逆王后卿不行非禮也

夏齊侯伐我北鄙圍成公救成至遇季孫宿叔孫豹帥師城成郛

成孟氏邑也崔氏曰公救成北至遇齊侯或已解圍

而去故公不進傳謂畏齊不敢進似誤矣若實畏齊不敢進當書次不書至也戴氏曰齊圍成而公親救既而二卿城成郭用見孟氏之強公不敢不出而二卿合比以弱公室也葉氏曰前圍而公救之固過矣今二氏復各以其軍為之城著三家之自為政也先師嘗言三家私相封殖城費則叔仲以媚季氏城成郭則季叔以私孟氏愚按魯自作三軍魯國已盡為三家之有而成又孟氏私邑諸家反責襄公不能救

成致郛壞而非時以城者殆腐儒之談不能尚論其  
世者也郛外城也孟氏蓋因是益固其守至定公十  
二年公圍成而不可墮

秋八月丁巳日有食之

書災

邾人伐我南鄙

邾黨於莒而附齊故齊伐我北鄙邾伐我南鄙魯告  
晉晉將為會以討邾莒晉侯有疾乃止許氏曰魯自



文襄失政齊與邾莒交伐其國由民分於三桓故也  
冬十有一月癸亥晉侯周卒

晉悼公生十四年而立立十五年而卒壽甫三十其  
經營楚鄭時年方二十四五功視桓文而德則過之  
嗚乎盛哉木訥趙氏曰晉室中債三郤誅厲公弑悼  
公以公族自外入繼即位之初慨然思復文公之業  
一為宋圍彭城而得諸侯再奪鄭虎牢而得陳鄭外  
抗強楚內連東吳蕭魚之會不戰不盟楚不敢爭鄭

不忍叛雖名陵之役不是過也其功業直將俎豆文  
公於百載之上襄成靈厲有慙德矣以傳觀之悼公  
之所以成霸業者抑亦內外兩治者歟其為國也施  
舍已責逮鰥寡振廢滯康乏困救災患禁淫慝薄賦  
斂宥罪戾舉不失職官不易方爵不踰德師不陵正  
旅不偪官民無謗言所以復霸若傳果無溢美則悼  
公直出威文之上

十有六年春王正月葬晉悼公三月公會晉侯宋公衛

侯鄭伯曹伯莒子邾子薛伯杞伯小邾子于溴梁戊寅  
大夫盟晉人執莒子邾子以歸齊侯伐我北鄙夏公至

自會

溴古  
閱反

晉悼公將為魯討邾莒未果而卒晉平公初立即速  
葬其父會諸侯于溴梁執邾子莒子以歸自謂討有  
罪能繼父志矣然因欲速反使其父悼公以中夏霸  
主下從大夫三月而葬之禮又身方居喪而速會諸  
侯以諸侯晏行歌詩之事諸侯咸在而反使大夫專

盟邾莒皆諸侯而反使大夫得執之以歸故高厚逃歸而齊怒滋甚又侵我北鄙矣晉平之不克繼如此五月甲子地震

記災異

叔老會鄭伯晉荀偃衛甯殖宋人伐許

戴岷隱曰許侯欲遷于晉許大夫不從許之勢甚迫許之請可念也晉人歸諸侯而獨使大夫伐許猶未甚怒也獨許鄭有宿怨鄭伯身從諸侯甘心於許故

以鄭序晉上為鄭主乎是師也趙木訥曰許為鄭虐  
遷於葉以依楚中國失許實鄭之由今晉不察復聽  
鄭伐許故十八年楚公子午伐鄭許故也悼公在位  
十五年置許不問以得許無益而徒犯楚怨為宋鄭  
之患也今平公聽鄭伐許無得而失則多矣

秋齊侯伐我北鄙圍郕

邾莒皆齊之黨相與伐我者齊貳晉執邾莒以齊故  
也故齊益伐我至於圍郕

大雩

旱而禱也大則僭也

冬叔孫豹如晉

以齊伐我故也齊自恃霸餘自柯陵之會遂不復出使大夫聽命使世子抗禮以魯服晉而伐之伐魯所以貳晉也故今穆叔往晉告急曰敝邑之急朝不及夕引領西望曰庶幾乎

十有七年春王二月庚午邾子貜卒

邾宣公立十八年卒，慆公穀並作賙。

宋人伐陳

高氏集註曰：七年，鄆之會，陳哀逃歸，自是十年不與諸侯會。而楚鄭連年侵宋，宋於是請於晉而伐之。

夏，衛石買帥師伐曹

孫林父之子孫蒯田于曹，而見詬。故石買為之伐之。曹人愬于晉，故明年晉執衛行人石買。

秋，齊侯伐我北鄙，圍桃。高厚帥師伐我北鄙，圍防。

齊素貳晉以虐魯晉平公又一旦執其相與伐我之  
邾莒所以重齊之怒而甚魯之禍嘗三伐北鄙再圍  
成今君臣又分攻其二邑蓋楚方不撓中國而齊以  
中國反自撓中國矣

九月大雩

旱祭而僭者也

宋華臣出奔陳

傳載華閱卒閱之弟華臣虐閱之子臯比賊殺其宰



華吳宋公已因向戌之言而舍之矣國人逐瘝狗入其室華臣懼而奔陳木訥曰華臣奔而乃奔其君之讎君可疾乎

冬邾人伐我南鄙

邾宣伐我已為晉執邾悼新立又復修怨此叛晉也此與齊也此祝柯之會所以復見執也

十有八年春白狄來

公羊曰不言朝不能乎朝也

夏晉人執衛行人石買

為石買無故伐曹而執之也然不當因其為行人而執之也

秋齊師伐我北鄙冬十月公會晉侯宋公衛侯鄭伯曹伯莒子邾子滕子薛伯杞伯小邾子同圍齊

齊魯婚姻之國今怒晉而泄之於魯三年而五加兵宜諸侯之所共怒也故同圍齊岷隱曰春秋未有書同圍者而此獨書見齊之得罪者多而諸侯之同心

者衆也

曹伯負芻卒于師

曹成公弒立二十三年而卒于師

楚公子午帥師伐鄭

石氏曰楚自蕭魚之會師不出者已七年今鄭子孔欲去諸大夫而專政召之來也故明年鄭討子孔

十有九年春王正月諸侯盟于祝柯晉人執邾子公至自伐齊取邾田自漵水季孫宿如晉

盟于祝柯之諸侯即同圍齊之諸侯也故不再叙晉  
執邾子者以邾之為齊伐魯也公至自伐齊者圍齊  
後復歸魯也取邾田自濼水者晉怒邾之伐魯不已  
故取邾之田以予魯自濼水為界也季孫宿如晉者  
拜其為魯伐齊且取邾田以予魯也然晉救魯可也  
動天下之兵以執邾子而取邾田不可也未足以服  
齊也柯公羊作阿

葬曹成公

計亦五月而葬

夏衛孫林父帥師伐齊秋七月辛卯齊侯環卒晉士匄帥師侵齊至穀聞齊侯卒乃還

齊未服而再伐之齊侯卒而還不伐喪也齊靈公立  
二十八年卒

八月丙辰仲孫蔑卒

蔑者孟文伯之子孟獻子孟子稱其有友五人者

齊殺其大夫高厚

齊之權臣崔與高也齊靈公死崔杼立世子光高厚  
傅公子牙光立執牙故杼殺高厚木訥曰高旣以罪  
誅齊之權在崔而已故不旋踵而有崔杼之逆高之  
殺崔之幸齊之禍也

鄭殺其大夫公子嘉

傳載子孔之為政也專國人患之子展子西帥國人  
伐之殺子孔而分其室其所以伐之之辭曰盜殺鄭  
三大夫時子孔知而不言也前年楚師至純門子孔

召之也然此其辭也專殺而又分其室者私也子孔死子產於是始為卿嘉公羊作喜

冬葬齊靈公

秋七月卒至冬葬計亦五月

城西郛

左氏曰懼齊也齊嘗伐北莒伐東邾伐南矣故今備西

叔孫豹會士匄于柯城武城

齊伐魯魯恃晉今齊以晉不伐喪而與晉平故穆叔  
聘晉且城武城為備

二十年春王正月辛亥仲孫速會莒人盟于向

仲孫速孟獻子名蔑之子孟莊子也莒自五年鄆屬  
魯而明年莒滅鄆其後八年十年十二年十四年嘗  
伐魯魯愬于晉晉嘗執莒子前年諸侯盟督揚以和  
解之故今孟莊子始與之結盟迄二十年莒魯不交

兵



夏六月庚申公會晉侯齊侯宋公衛侯鄭伯曹伯莒子  
邾子滕子薛伯杞伯小邾子盟于澶淵秋公至自會

澶市

然反

左曰齊成故也木訥曰齊靈公卒晉士匄聞喪不伐  
振旅而還齊人德之求成于晉晉合十三國歃血于  
澶淵小大協和天下賴之愚按圍齊之役十二諸侯  
環其郛靈公至欲遷避而終不服今因感其不伐喪  
而求服甚矣禮之可以服人也

仲孫速帥師伐邾

傳稱邾屢伐魯魯以有諸侯之事弗能報今孟莊子報之然晉已為魯伐邾取田畀魯澶淵之會魯又方與邾同盟矣不宜更伐之也孟莊子父喪方新而盟莒伐邾專橫如此急於擅魯爾

蔡殺其大夫公子燮蔡公子履出奔楚陳侯之弟黃出奔楚

傳載蔡文公欲改事晉畏楚不果而卒公子燮求從

先君以利蔡蔡人殺之變之弟履遂奔楚陳之慶虎  
慶寅專政誣公子黃與變同謀黃亦呼於國而奔楚  
愚按澶淵之會獨陳蔡不與必諸大夫志在楚也

叔老如齊

齊魯既同澶淵之盟於是釋怨而修好

冬十月丙辰朔日有食之

書災

季孫宿如宋

傳曰報向戍之聘也宋人重賄之

二十有一年春王正月公如晉

魯連歲困於齊邾莒今晉為平齊而執邾莒故往謝之也

邾庶其以漆問丘來奔

庶其邾大夫也漆與問丘邾之二邑庶其盜之以奔魯也左氏載季氏妻庶其以公之姑姊其從者皆有賜臧武仲謂之賞盜岷隱曰昔莒僕以寶玉來奔季

文子使出諸境甚矣季武子之有愧於其祖也木訥  
曰今一受庶其之叛其後莒牟夷邾黑肱接踵而至  
曲阜之地匯為賊淵愚按此所謂春秋三叛臣者也  
然魯之受之皆非君命襄公如晉而庶其以漆間丘  
來昭公如晉而牟夷以牟婁防茲來昭公在乾侯而  
黑肱以濫來然則實為賊淵者惟季氏歟

夏公至自晉

如晉拜師踰時方返

秋晉欒盈出奔楚

左氏載欒盈之母欒祈與其老州賓通懼欒盈之討也愬於欒祈之父范宣子誣欒盈將為亂宣子信之使盈城境而逐之盈遂奔楚木訥謂盈將倚楚以入叛也按欒書弑厲公而免於討欒厲汰而以内亂亡其家盈奔雖非其罪而積惡有自來矣

九月庚戌朔日有食之冬十月庚辰朔日有食之

襄陵許氏曰比年食今又比月食蓋自是八年之間

而日七食禍變重矣徂徠石氏曰此年九月十月日食二十四年七月八月日食三年之內連月而食者再諸儒以為歷無此法或傳寫之誤然漢高二年十月十一月亦頻食天道遠按交會之度而求之亦難矣

曹伯來朝

曹武公即位既除喪而始來朝也

公會晉侯齊侯宋公衛侯鄭伯曹伯莒子邾子于商任

士音

左氏曰錮欒氏也木訥曰一大夫出奔動天下諸侯以錮之盈亦何能為哉蓋懼其脅楚以入爾岷隱曰藥盈實奔楚非晉所得錮也商任之會非徒無益而又害之高氏集註曰范鞅欲使盈無所容於世故盈發憤卒興大亂此以私敗公足為戒也

公羊穀梁皆於是年附十有一月庚子孔子生

二十有二年春王正月公至自會



會于商任而歸也

夏四月秋七月辛酉叔老卒

注子叔齊之子也蓋叔盼之孫聲伯之子其子弓嗣是曰子叔敬子

冬公會晉侯齊侯宋公衛侯鄭伯曹伯莒子邾子薛伯杞伯小邾子于沙隨公至自會

時欒盈自楚如齊范鞅知之故復為沙隨之會以錮之師氏曰欒盈非有犯上之罪徒以范氏私怨再會

諸侯以錮之是直起其惡心而有曲沃之事夾漈曰  
齊侯陽會晉而陰納欒氏故齊晉之仇復興

楚殺其大夫公子追舒

追舒者令尹子南也傳載觀起有寵於子南未益祿  
而有馬數十乘遂殺子南於朝轅觀起於四竟蘇氏  
謂罪不至死也

二十有三年春王二月癸酉朔日有食之

書災

三月己巳杞伯匄卒

匄古害反

杞孝公立十七年卒

夏邾畀我來奔

畀我者邾庶其之黨也既納其叛邑又納其叛人

葬杞孝公

晉平公之母舅故魯會其葬而書杞始此也

陳殺其大夫慶虎及慶寅陳侯之弟黃自楚歸于陳

傳載二慶專陳公子黃奔楚陳侯如楚楚用黃之愬

欽定四庫全書

黃氏日抄

八五

使慶樂往殺之而黃得歸楚木訥曰黃以君之弟而見逐陳哀侯僅免為衛衍魯昭幸矣今能殺二慶黃之謀楚之力也

晉樂盈復入于晉入于曲沃

樂盈自楚如齊齊因媵晉嫁女竊載盈入于盈之舊邑曲沃盈帥曲沃之甲因魏獻子以書入絳兵敗奔曲沃晉人圍之按傳所載先入沃後入晉其次第與經不同或者疑之孫氏曰此樂盈以曲沃之甲入晉

敗而後奔入曲沃也

秋齊侯伐衛遂伐晉八月叔孫豹帥師救晉次于雍榆

雍於用反

齊自恃霸餘素不從晉晉靈之世衛嘗為晉伐齊齊故伐衛以報其役志實在伐晉也豹救之而次于雍榆者孫氏謂不救則懼晉之討往救則畏齊之強也木訥曰齊莊即位德士句之不伐喪姑與晉平及其幸晉有欒氏之亂復伐晉以報平陰之役然不修澶

淵之好而修平陰之怨莊公亦好亂樂禍者宜其不善終也

巳卯仲孫速卒

此孟獻子之子孟莊子也莊子無適嗣公鉏長而愛其幼子名紇故臧武仲為之立紇是為悼子

冬十月乙亥臧孫紇出奔邾

紇下沒反

臧武仲阿季氏意為之廢長立少其長公鉏既見廢亦為孟氏廢其長秩而立其少羯以激怨孟氏蓋孟

氏素惡臧氏者也孟氏遂告季氏謂臧氏將為亂臧武仲斬關出奔孟椒盟之曰無或如臧孫紇干國之紀犯門斬關武仲如防請後魯立臧為而臧紇致防奔齊孔子謂其要君者也

### 晉人殺欒盈

傳載晉人克欒盈于曲沃盡殺欒氏之族不書殺其大夫者黎氏謂前書出奔已非晉大夫次書入晉則晉之寇此書殺欒盈則討賊之辭也

齊侯襲莒

傳載齊侯還自晉而襲之也趙子曰掩其不備曰襲  
黎氏曰春秋用兵雖多無書襲者此獨曰襲蓋譏諸  
侯行賊盜之事臧武仲於其伐晉亦云聞晉亂而後  
作抑君似鼠鼠晝伏夜動

二十有四年春叔孫豹如晉仲孫羯帥師侵齊

豹如晉賀克欒氏也羯侵齊為晉故也木訥曰豹如  
晉以雍榆之次為功晉照其偽而有言焉故羯侵齊



以悅之魯若移其侵齊之役於雍榆之次則豹不必往羯不必侵也岷隱曰豹之如晉賀克欒氏羯之侵齊為晉復怨夫當事而救不能致力既事而聘何益於晉當齊伐晉不能擊齊既退而侵何損於齊君子是以知其為文具也

夏楚子伐吳

左傳載楚為舟師伐吳不為軍政無功而還木訥謂楚怨吳之與晉今雖吳與晉不交者已十年至是凡

三伐吳

秋七月甲子朔日有食之既

食之既災之甚也

齊崔杼帥師伐莒

木訥曰齊以盜竊之計襲莒實無得焉故崔杼因復  
伐莒成君之惡而已得行其姦岷隱曰君子是以知  
崔杼有異志助其君為虐矣

大水

書災也許氏曰夷儀之會以水不克伐齊則知水之所被者廣非特魯之災也

八月癸巳朔日有食之

食之既矣而又連食尤其災也

公會晉侯宋公衛侯鄭伯曹伯莒子邾子滕子薛伯杞伯小邾子于夷儀冬楚子蔡侯陳侯許男伐鄭公至自會

左氏謂謀將伐齊以水不克岷隱曰會于夷儀欲伐

齊不克乃使楚人伐鄭以牽制中國木訥曰楚未嘗  
一日忘鄭特觀中國之釁而已今晉不能和諸侯以  
制楚而乃摟諸侯以伐齊且勝齊孰愈於制楚哉夷  
儀之會無損於齊徒為鄭招寇也

### 陳鍼宜咎出奔楚

傳謂陳復討慶氏之黨故鍼宜咎出奔楚

### 叔孫豹如京師

傳載齊城王城之邾穆叔如周賀城許氏曰自宣九

年仲孫蔑如京師其後五十餘年始有叔孫豹如京師以罕書也自是不復聘王矣

大饑

木訥曰宣十年秋大水而冬饑今秋大水而冬大饑無先具也

二十有五年春齊崔杼帥師伐我北鄙夏五月乙亥齊崔杼弑其君公會晉侯宋公衛侯鄭伯曹伯莒子邾子滕子薛伯杞伯小邾子于夷儀

傳載崔杼見棠姜美而取之莊公通焉杼欲弑莊公  
故伐魯將致晉師弑君以說于晉而不獲遂歸而弑  
之夷儀之會將伐齊以討崔杼之弑齊賂之而還木  
訥曰諸侯不能討逆反冕弁端委以乞賂於盜為辱  
大矣齊莊公立凡五年

六月壬子鄭公孫舍之帥師入陳

左氏載初陳侯會楚子伐鄭當陳隧者井堙木刊鄭  
人怨之故今入陳

秋八月己巳諸侯同盟于重丘公至自會

傳曰齊成也按晉此行欲報齊莊朝歌之師也岷隱曰舍崔氏之大罪復莊公之小怨况又納賂焉何以宗諸侯愚按重丘之盟列弑君之齊不惟不克伐齊適以成其亂爾

衛侯入于夷儀

自剽篡立而衛獻公行出奔今入于夷儀夷儀衛之邑也及甯喜弑剽始復歸于衛之都

楚屈建帥師滅舒鳩

傳載舒鳩叛楚吳救之大敗故楚滅舒鳩木訥曰羣舒近楚為楚蠶食至是盡矣成十七年滅舒庸宣八年滅舒蓼及是滅舒鳩其先本與楚俱張荆舒是懲是也而今皆併於楚

冬鄭公孫夏帥師伐陳

傳載子西復伐陳陳及鄭平按鄭之再伐甚矣以子產獻捷于晉子產辭辨而晉受之故恃此而再伐也



十有二月吳子遏伐楚門于巢卒

傳載諸樊伐楚以報舟師之役門于巢巢牛臣隱于短牆而射之卒吳諸樊立凡十三年

二十有六年春王二月辛卯衛甯喜弑其君剽衛孫林父入于戚以叛甲午衛侯衎復歸于衛

傳載衛孫林父甯殖逐衛獻公而立剽甯殖後悔之垂沒屬其子喜復獻公喜許諾至是獻公自夷儀與甯喜言於是甯喜弑剽孫林父元逐獻公而立剽者

也故入于戚以叛蓋戚其私邑也剽弑林父出而獻  
公復歸愚按剽本篡立而書甯喜弑其君者喜嘗事  
之為君十年也衛侯歸而書名者剽弑衎歸衛有二  
君書名以別也

夏晉侯使荀吳來聘公會晉人鄭良宵宋人曹人于澶

澶澶市  
延反

傳載晉黨衛之孫林父召公同會澶澶取衛懿氏六  
邑以與孫氏愚按孫林父衛之叛賊也晉平公反為

之封殖如此鄭良霄獨書名者胡氏謂鄭伯為衛侯  
故如晉知其不助孫氏也時趙武主會止書晉人

秋宋公殺其世子痤

才禾反

傳載痤美而狠向戌惡之寺人伊戾事痤無寵誣痤  
與楚客盟將為亂向戌曰固聞之痤求其弟佐為請  
向戌聒而與佐語故使佐失期痤無救乃縊已而公  
知其寃烹伊戾愚謂此向戌之罪也

晉人執衛甯喜

傳載晉人執喜詰之曰曷為納君而伐孫氏則是為  
叛賊之異已而執之非以其有弑君之罪而執之也  
八月壬午許男甯卒于楚冬楚子蔡侯陳侯伐鄭葬許  
靈公

傳載許靈乞師于楚以死為期楚故為之伐鄭而後  
葬也按靈公立四十五年為讎鄭而死蠻荆

二十有七年春齊侯使慶封來聘

齊景公初即位慶封得政欲善於諸侯於是來聘

夏叔孫豹會晉趙武楚屈建蔡公孫歸生衛石惡陳孔  
真鄭良霄許人曹人于宋

左氏載宋向戌善於晉趙文子又善於楚令尹子木  
於是合晉楚于宋欲弭諸侯之兵以為名

衛殺其大夫甯喜衛侯之弟鱄出奔晉

甯喜既弒剽迎復獻公而專公患之公孫免餘為公  
殺之初喜之謀復獻公也謂公不信欲得其弟鱄之  
言以為信喜以鱄之言而返公今公殺喜故鱄出奔

終身不仕

秋七月辛巳豹及諸侯之大夫盟于宋

向戌會十四國盟以弭兵上文惟序九國者注云齊秦不交見邾滕為私屬皆不與盟宋為地主與盟不待序也是役也楚衷甲爭盟晉讓楚先軟書先晉者貴信也鄭夾漈曰宋之會大成也未有合晉楚之成而大夫專之者也然自宋之盟四十年九國不仇兵戴岷隱曰弭兵之功小大夫專盟之罪大大夫固嘗

盟于溴梁矣當是時諸侯皆在會憚於一盟遣大夫  
以為盟是諸侯之怠非大夫之專也大夫專盟未有  
如宋者也春秋書宋之盟特言諸侯者明君臣之義  
特先晉人者正夷夏之分孫泰山曰自宋之會天下  
皆大夫專之

冬十有二月乙亥朔日有食之

書災也左氏謂再失閏劉氏權衡辨其不然

二十有八年春無冰

三之日納于凌陰今正月也去年常燠故今無冰

夏衛石惡出奔晉

傳載討甯氏之黨故惡出奔

邾子來朝

邾悼公舊每伐魯自魯愬之晉而執之取其田納其  
叛邑邾宜無以自立今其來朝蓋屈服也

秋八月大雩

旱祭之僭



仲孫羯如晉

傳為宋之盟告將如楚也

冬齊慶封來奔

傳載慶封好田而嗜酒與其子慶舍政以其內實遷于盧蒲癸氏國遷朝焉慶舍為盧蒲癸所殺慶封伐之弗克遂來奔齊人來讓奔吳吳與之朱方富於其舊

十有一月公如楚

欽定四庫全書

黃氏日抄  
二十一

卷

秋既使羯告於晉今乃如楚傳載公及宋公陳侯鄭伯如楚岷隱曰率天下朝楚明告于晉晉不得而辭也尚得以宋之盟為晉趙之功乎夾漈曰為宋之盟故從楚之諸侯皆朝于晉從晉之諸侯皆朝于楚謂之交好魯君之如晉屢矣自周公以來於今始朝楚十有二月甲寅天王崩

周靈王立二十七年崩

乙未楚子昭卒

楚康王立十五年卒

二十有九年春王正月公在楚夏五月公至自楚

岷隱曰當正月之吉身在夷狄之國左氏以為釋不朝正于廟公羊以為存君穀梁以為閔公皆得之矣木訥曰成十年襄四年昭十五年公皆如晉皆踰年而反不書公之所在惟昭公見逐於季氏三年之間皆書正月公在乾侯今公如楚權在季孫宿觀左氏載季氏取卞公謂公冶曰吾可入乎則事亦危矣此

所以書公之所在也其書公至自楚蓋楚止公以送  
楚之葬凡七月乃得歸穀梁謂殆其往而喜其返也  
庚午衛侯衎卒

獻公立通前三十三年嘗為孫林父所逐者十年

閻弑吳子餘祭

則戒反

左氏傳載吳伐越獲俘焉以為閻使守舟餘祭觀舟  
閻以刀弑之

仲孫羯會晉荀盈齊高止宋華定衛世叔儀鄭公孫段

曹人莒人滕人薛人小邾人城杞晉侯使士鞅來聘杞子來盟

杞晉平公母家也故合諸國城之士鞅杞子之來皆謝城杞也

吳子使札來聘

公羊盛言札之賢而進之劉氏質夫曰札不稱公子以辭國而生亂者札為之也張氏曰季子為其父之所立其兄之所屬違父兄之命徒以潔身而去為高

觀宗國之危亂僚與光之相殘若秦人視越人之肥瘠况身為貴戚自古聖賢未有視社稷安危若是恣者夫子所謂果哉末之難矣其復位而待之言曰非我生亂君子殆未之信也劉質夫之傳得聖人之旨矣趙氏鵬飛曰彼其來聘豈情也哉窺中國而已愚按春秋書吳札之來聘與書楚椒秦術之來聘同而史載其後闔閭弑僚札為之使東諸侯其窺中國可知矣公羊言札終身不入吳國者亦妄也苟不義其

為如曹子臧猶可也胡為而為之來聘為之來聘而云不入其國可乎公羊因其逃國而高之故過為之辭凡前諸儒之說皆正也

秋九月葬衛獻公

五月而葬

齊高止出奔北燕

高止高厚之子北燕召公之後今始見於經高止好以事自為功且專公孫薑公孫竈放之而奔木訥曰

自高止奔之而燕以亂燕伯奔齊齊侯伐燕皆基於  
高止然愚恐亦意之爾

冬仲孫羯如晉

羯居  
謁反

左氏謂此年士鞅來聘而報之也

三十年春王正月楚子使遠罷來聘

罷音  
皮

高氏集註曰公踰年在楚楚邾敖新即位故使遠罷  
以報之

夏四月蔡世子般弒其君固



以閨門之惡也固者景公也立四十九年

五月甲午宋災宋伯姬卒

伯姬以傅母不在宵不下堂逮乎火而死蓋寧死而不失其節

天王殺其弟佞夫王子瑕奔晉

周景王初立儋括謀亂欲立佞夫佞夫不知而王殺之子瑕佞夫之與也故奔

秋七月叔弓如宋葬宋共姬

欽定四庫全書

黃氏日抄  
三十一

一百

叔弓者叔老之子使之共葬賢伯姬也謚共從夫正也

鄭良霄出奔許自許入于鄭鄭人殺良霄

左氏載良霄者伯有也強子哲使楚而嗜飲不戒子哲攻之伯有醉奔許許者鄭仇也伯有復還以其甲入駟帶帥國人伐之伯有死於羊肆良霄不稱大夫者戴氏謂其出奔已絕於鄭

冬十月葬蔡景公

四月見弒十月方葬

晉人齊人宋人衛人鄭人曹人莒人邾人滕人薛人杞

人小邾人會于澶淵宋災故

澶市  
延反

公羊曰卿不憂諸侯崔氏曰直為宋災之故而為會  
其無補於宋明矣

三十有一年春王正月夏六月辛巳公薨于楚宮

如楚七月不知恥又歸而效之作楚宮薨于是宮非

正也

秋九月癸巳子野卒

立而卒傳以為毀也

己亥仲孫羯卒

慶父之後孟孝伯也

冬十月滕子來會葬癸酉葬我君襄公

諸侯之喪士弔大夫送葬滕成公來會葬非禮也


十有一月莒人弑其君密州

傳稱公子展輿弑其君自立而經書莒人當以經為

正

襄公四歲即位權在仲孫蔑叔孫豹季孫行父及其子季武子作三軍以分公室然自即位至十五年皆晉悼公再伯之十五年國以無事悼公既沒困於齊邾莒連年之師晉平公為之平齊而執邾莒稍吐氣矣及平公與楚盟於宋與楚弭兵楚遂橫行中國公兩事晉楚見辱於楚得脫而歸不自痛憤反效夷言作楚宮卒沒於楚宮是豈能自立

者哉



黃氏日抄卷十一